

40 GODINA RADA UDRUŽENJA GEODETSKIH INŽENJERA I GEOMETARA TUZLANSKOG KANTONA

Obilježavajući 40 godina postojanja i rada Udruženja geodetskih inženjera i geometara Tuzlanskog kantona, ranije Udruženja sjevero-istočne Bosne, ukratko bih podsjetio na neke aktivnosti iz bogatog sadržaja rada.

Udruženje je počelo sa radom 1961. godine, te svoju aktivnost prije svega zasnivalo na zadacima koji su proizilazili iz programa Saveza GIG-a i sprovođenju odluka i zaključaka donesenih na skupštini udruženja i sastancima predsjedništva.

Ciljevi i zadaci Udruženja utvrđeni su u skladu sa političkim i ekonomskim razvojem, te potrebama naše zajednice na osnovu kojih je utvrđena programska orijentacija za podsticanje razvoja i usavršavanja geodetske djelatnosti.

Sagledavajući mjesto i ulogu geodetske struke, ovo udruženje je razvijalo svoju aktivnost, pa je na tom putu i ostvarilo velike rezultate koji su i te kako značajni za upravni, privredni, društveni, naučni i kulturni razvoj ovog područja.

Uveliko se radilo na podizanju stručnog nivoa članova na njihovom aktiviranju i neprekidnom omasovljavanju.

Radilo se na jačanju veza i ravnopravne saradnje sa drugim udruženjima, saradnji i razmjeni iskustava sa odgovarajućim organizacijama u inostranstvu, bližem i daljem okruženju. Staralo se o zaštiti položaja, interesa i društvenog ugleda organizacija i članova i istovremeno nastojalo da se radni entuzijazam i društveno angažovanje geodetskih inženjera i geometara tako usmjerava, koordinira i organizuje, da što više doprinosi afirmaciji razvoju geodetske struke i kodeksa ponašanja.

Smatram da je udruženje dalo svoj pun doprinos razmatranju i rješavanju svih vitalnih pitanja za geodetsku struku bez obzira u kom su stepenu i obliku prihvaćeni njegovi stavovi.

U ranijem periodu sigurno, a donekle i danas nadležni organi sa posebnom pažnjom i uvažavanjem uzimaju u obzir stavove, primjedbe i prijedloge udruženja i njihovih organa smatrajući ih odrazom mišljenja članova koji su najpozvaniji da iznesu svoja gledanja na predmetna pitanja.

Kada je u pitanju stručni nivo članova i tema koje su se nalazile na dnevnom redu ovih susreta nažalost moram da priznam da su zapisnici i ostala dokumentacija iz ranijih godina zbog izmještanja zagubljeni pa je teško apsolvirati sve teme koje su obrađivane.

No ipak ja bih pomenuo nekoliko pitanja a to su:

- Zakon o premjeru i katastru nekretnina,

- Zakon o komunalnim uređajima,

- Zakon o geodetskoj djelatnosti i ostali zakoni i pravilnici vezani za premjer,

zatim Uloga geodezije u privatizaciji, slobodna poligonska i mikro-nivelmanska mreža, oskultacije brana, zadaci i rad geodetskih stručnjaka u rudnicima i na površinskim kopovima te automatizacija rada u geodeziji i druge.

U okviru svojih aktivnosti geodeti TK u ovoj godini su između ostalog uz prigodnu izložbu obilježili i jubilaru 115. godišnjicu katastra zemljišta Bosne i Hercegovine.

Pored toga brzi tempo razvoja novih tehnologija i njihove primjene u geodeziji od ogromnog su značaja za geodetsku djelatnost i njen doprinos za privredni i društveni razvoj na nivou savremenih društava.

Imajući u vidu da imamo visoko obrazovane stručnjake koji prate i poznaju savremena tehnološka dostignuća udruženje je iskoristilo priliku da ih angažuje te da članove upozna sa novim tehnologijama i pravcima daljeg razvoja u svijetu, da sagledamo stanje u našoj zemlji u pogledu primjene novih tehnologija u raznim oblastima geodezije i savremenog instrumentarija i pribora, kao i raznih metoda rada za prikupljanje, pohranjivanje, njihovo ažuriranje, komuniciranje sa njima kao i korisnički prikaz tzv. Geoinformacioni sistemi.

Za neke teme predavači su bili iz Zagreba, Beograda, Sarajeva a bilo je predavača iz našeg Udruženja.

Imali smo priliku da prisustvujemo prezentaciji novih instrumenata počev od autoredukcionih tahimetara Dahlta, Rds-a, elektro optičkih tahimetara do elektro optičkih daljinomjera kao što su totalne stanice, softveri i na kraju da pomenem temu iz Čelića a to teoretski dio o GPS-u a koju danas nastavljamo sa praktičnom primjenom.

Treba napomenuti da ovi susreti pored značaja koji imaju u stručnoj edukaciji imaju i veliki društveni značaj jer se održavaju uglavnom po redosljedu u svim opštinama, a na njima se okuplja veliki broj geodetskih stručnjaka te na taj način se više upoznaju, razmjenjuju mišljenja i zajednički rješavaju poneke probleme, a mlađe kolege se više afirmišu.

Nije mi poznato koliko članova je brojalo ovo udruženje kada je formirano, odnosno za vrijeme mandata prvog predsjednika predsjedništva, udruženja, gospodina Nezira Kazića, ali mogu sa ponosom da istaknem da udruženje danas broji oko 280 članova.

Ne bih nabrajao sve predsjednike predsjedništva udruženja, iako su svi dali ogroman doprinos u radu ali bih pomenuo prvog Nezira Kazića, te poratnog Hidajeta Pozderca. Obojica imaju posebne zasluge jer su i jedan i drugi organizovanje počinjali skoro iz početka.

Za svoj rad i doprinos mnoge starije kolege su dobili i određena društvena priznanja, počev od Begića, Fakića, Šehovića Maglića i drugih, pa i danas kada obilježavamo jubilej, na prijedlog starijih kolega komisija je razmatrala i dala na usvajanje odluku o dodjeli priznanja.

Valja istaći i to, da Udruženje kao društveno-stručna organizacija kroz razmatranja najaktuelnijih pitanja koja se tiču kako geodezije, novih tehnologija, pravnih aspekata evidencije o nekretninama i drugih pitanja stiče sve veći ugled i novu afirmaciju, a da članovi udruženja očekuju od njega dalje angažovanje u tom pravcu.

Bilajac Fuad